

UKIUMUT MISSINGERSUUSIORFIUSUMUT 2006-IMUT KOMMUNINUT ATAATSI-MOORTUMIK TAPIISSUTIT PILLUGIT ISUMAQATIGIISST

Illuatungeriit isumaqatigiipput Naalakkersuisut 2006-imut Inatsisartut Aningaasanut Inatsisissaattut Siunnersuutaanni 2006-imi kommuninut ataatsimoortumik tapiissutitut siunnersuusiortoqassasoq 775.431.000 kr.-inik. Taamaalillutik ataatsimoortumik tapiissutit 2005-imit 20,9 mio. kr.-inik appaariaateqarput. Ilanngussaq 1-imi takutinneqarput 2005-imut sanilliullugu isumaqatigiissutip ataatsimoortumik tapiissutit qanoq allanngortinnerai. Isumaqatigiissummi tunngavigineqartut ataasiakkaat tulliuttuni nassuiarneqarput.

1. Akinut akissarsianullu iluarsiiisutit

Illuatungeriit isumaqatigiipput ataatsimoortumik tapiissutit 2005-imi 796,4 mio. kr.-iusut, 1,55 %-inik, akinut akissarsianullu iluarsiiivigineqassasut, taakku 2006-imi ukiunilu missingersuusiortofiusuni 12.344.000 kr.-inut naapertuullutik.

2. Nalinginnaasumik sipaarutit

Naalakkersuisut 2004-mut aningaasanut inatsisissatut siunnersuut aqutigalugu ilinniartitaanernut inuussutissarsiutinillu ineriartortitsinermut amerlanernik aningaasaliissuteqarniarlutik aningaasaliissutinik pingaarnersiueqqipput. Naalakkersuisut Aningaasaqarnikkut ingerlatsineq pillugu Nalunaarut 2005-imi siunnersuutigaat 2012 – 2013-imit ilinniartitaanernut aningaasaliissutit 400 mio. kr.-inngortinneqarnissaat siunertaralugu 2006-imut aningaasanut inatsimmissaaq pingaarnersiueqqittoqassasoq.

Aningaasaqarnikkut ingerlatsineq pillugu Nalunaarut 2005-imi ilinniartitaanernik suliniuteqarnerunissamat takussutissiap takutippaa suliniut tamakkiisumik timitalerneqarpat inuit ullumimit 2.800-inik amerlanerusut ukiut tamaasa ilinniagaqassasut assigisaanilluunniit. Inuit taakku sulisinnaasuninngaanneersuupput. Assersuutit illoqarfinni suliffissaaleqisut nalunaarsorneqarsimasut qaammammut agguaqatigiissillugu 1.900-uupput, nunaqarfinni suliffissaaleqisut qaammammut agguaqatigiissillugu 400-uusut.

2005-imut Aningaasanut inatsimmi Inatsisartut kommuninut ataatsimoortumik tapiissutitni sipaarutissat ilannguppaat, 2006-imi 25,9 mio. kr.-inut, 2007-mi 51,7 mio. kr.-inut aammalu 2008-miit 77,1 mio. kr.-inut naapertuuttut. Naalakkersuisut 2005-imut aningaasanut inatsimmi sipaaruteqarnerunissamat siunnersuumminnut tunngavigaat ilinniartitaanerit qaffasissusaasa annertusineqarnissaannut sillimmatinut aningaasaliissutissanik ujarlernissaq.

Illuatungeriit isumaqatigiipput ilinniartitaanernut inuussutissarsiutinillu ineriartortitsinermut aningaasaliissutit amerlanerusut aningaasalersorneqarnissaannut pingaarnersiueqqinnissaq suliassaasoq nammatassarlu kommunit aammalu Namminersornerullutik Oqartussat ataatsimut ingerlattariaqaa-
gaat.

Illuatungeriit kommunit aningaasaqarnerat eqqarsaatigalugu isumaqatigiipput ilinniartitaanernut suliniuteqarnerunerup aningaasalersorneqarnissaannut kommunini sipaarutissat timitalerneqarnis-
saat ukiumik affarmik kinguartinneqassasoq, taamaalilluni kommuninut ataatsimoortumik tapiissu-
tini sipaarutit 2006-imi 12,9 mio. kr.-inik, 2007-mi 38,8 mio. kr.-inik, 2008-mi 64,7 mio. kr.-inik
aammalu 2009-mit 77,7 mio. kr.-inik timitalerneqarlutik.

3. Akileraartarnermut tunngasut nunap immikkoortuinut eqiterneqarnerat

Inatsisartut isumaatigiillutik 2. maj 2005-imi aalajangerpaat akileraartarnermut akitsuusiisarnermul-
lu tunngasut aaqqissuuteqqinneqassasut nunallu immikkoortuinut eqiterneqassasut.

Akileraartarnermut akitsuusiisarnermullu tunngasut 1. januar 2007-mit nunap immikkoortuinut eqi-
terneqassapput, naatsorsuutigineqarporlu tamatuma kingorna akiliisitsiniarnermut tunngasut 1. ja-
nuar 2008-mit nunap immikkoortuinut eqiterneqassasut.

Illuatungeriit isumaqatigiipput akileraartarnermut tunngasut nunap immikkoortuinut eqiterneqarne-
rat suliniutitut ingerlanneqassasoq, tamatumani KANUKOKA kommuninilu ingerlatsivinnit aallar-
titat suliassap aaqqissuulluakkamik inerneqarnissaa siunertaralugu eqeersimaartumik peqataatinne-
qassallutik.

Taamaattumik illuatungeriit akileraartarnermut tunngasut nunap immikkoortuinut eqiterneqarnis-
saannut pingaarnertut najoqqutarisassat ilanngussaq 2-mi takutinneqartut isumaqatigiissutigaa.

4. Aningaasartuutit inatsisitigut pisussaaffigisat iluarsiivigineqarnerat nutaamillu naliliiffi- neqarnerat

4.1 2003-2004-mi siusinaartumik pensionisialinnut aningaasartuutit iluarsiivigineqarnerat

50/50-imik aaqqissuussineq atorlugu kommunit siusinaartumik pensionisianut 2003-mi 2004-milu
aningaasartuutaat kommunit ataatsimoortumik tapiissutit pillugit isumaqatigiissutit naapertorlugit
ataatsimoortumik tapiissutinit taarsiiviginnissutaannit 1.598.000 kr.-inik amerlanerupput.

Taamaattumik illuatungeriit isumaqatigiipput ataatsimoortumik tapiissutit 2006-imi 1.598.000 kr.-
inik qaffanneqassasut.

4.2 Siusinaartumik pensionisiat iluarsiivigineqarnerat, 50/50-imik aaqqissuussinermi pensionisiallit amerliartornerat, 2006

2001-2002-mut kommuninut ataatsimoortumik isumaqatigiisummi illuatungeriit isumaqatigiipput ataatsimoortumik tapiissutit ima iluarsineqassasut, kommunit siunissaq qaninnerusoq ungasinnerusorlu eqqarsaatigalugu siusinaartumik pensionisiat 10%-imit 50%-inut qaffannerannut kommunit aningaasalersuinnerminnut tamakkiisumik taarsiivigineqassasut.

Taamaattumik illuatungeriit isumaqatigiipput ataatsimoortumik tapiissutit 2006-imi 5.900.000 kr.-inik amerlineqassasut, 50/50-imik aaqqissuussinermi 2006-imi siusinaartumik pensionisiallit nutaat amerlassusissaattut naatsorsuutigineqartunut naapertuuttut.

4.3 Ineqarnermut tapiissutit 2004-mut iluarsiivigineqarnerat

2004-mi kommunit ineqarnermut tapiissutinut aningaasartuutaannit 6.190.000 kr.-inik amerlanerusunik kommunit taarsiivigineqarput.

Taamaattumik illuatungeriit isumaqatigiipput ataatsimoortumik tapiissutit 2006-imi 6.190.000 kr.-inik ikilineqassasut, kommunit 2004-mi ineqarnermut tapiissutinut aningaasartuutikinnerunerannut naapertuuttut.

4.4 Ineqarnermut tapiissutit 2006-imit iluarsiivigineqarnerat

2003-mut 2004-mullu naatsorsuutit tunngavigalugit Namminersornerullutik Oqartussat naatsorsuutigaat ineqarnermut tapiissutinut aningaasartuutit 2006-imit missingerneqarnerat katillugit 15 mio. kr.-inik annikillineqassasoq. Kommunit namminneq akiligassaat 40%-iuvoq. Kommunit aningaasartuutissatut missingiussanit akiligassaat taamaalillutik 6 mio. kr.-inik ikinnerussapput.

Taamaattumik illuatungeriit isumaqatigiipput ataatsimoortumik tapiissutit 2006-imit 6.000.000 kr.-inik ikilineqassasut, kommunit 2006-imit ineqarnermut tapiissutinut aningaasartuutikinnerunissaannut missingikkanut naapertuuttut.

5. Meeqqat atuarfianni akuleriissitsineq

1995-imi meeqqat atuarfiannik iluarsartuusseqqinnermi illuatungeriit isumaqatigiipput kommunit piffissami ikaarsaariarnermi ukiuni aqqaneq marlunni ilinniartitsisut akissarsiaannut aningaasartuuteqarnerunerminnut taarsiivigineqassasut. 2005-imi kommunit 1.436.000 kr.-inik taarsiivigineqarput. Isumaqatigiissut 1. august 2006-imi naassaaq, taamaattumik kommunit ukiumoortumik 1.436.000 kr.-inik aningaasartuutaasa taamaallaat 7/12-iannik 2006-imi taarsiivigineqassapput.

Taamaattumik illuatungeriit isumaqatigiipput ataatsimoortumik tapiissutit 2006-imi 838.000 kr.-inik amerlineqassasut.

6. Atuarfitsialak

Meeqqat atuarfiannik iluarsartuusseqqinnermi Atuarfitsialammi 11. klassit atorunnaarsinneqarsimavoq. Kommunit 2009-p tungaanut ikaarsaariarnermi tiiminut aningaasartuuteqarnerupput ataatsimoortumik tapiissutini taarsiivigineqartussanik. 2009-mi Atuarfitsiliak tamakkiisumik atuutilissaaq, tamatumalu kingorna ataatsimoortumik tapiissutini taarsiisuteqartoqarunnaassaaq.

Illuatungeriit isumaqatigiipput ataatsimoortumik tapiissutit 2006-imi 200.000 kr.-inik ikilineqassasut. 2007-mi illuatungeriit ataatsimoortumik tapiissutit 0,3 mio. kr.-inik qaffanniarpaat, 2008-mi illuatungeriit ataatsimoortumik tapiissutit 6,3 mio. kr.-inik apparniarlugit.

7. Immikkut annertusisamik atuartitsineq

Illuatungeriit isumaqatigiipput 2006-imi immikkut annertusisamik atuartitsinermit utertitassatut annertussuserititaq akunnermit atuartitsissummut 60 minutsinut 481,64 kr.-inut aalajangersarneqassasooq. Annertussuserititatut Kanukokamit aammalu Kultureqarnermut, Ilinniartitaanermut, Iisimatusernermut Ilageeqarnermullu Pisortaqaqfimmit naatsorsorneqartoq ilinniartitsisunut tjenestemandiusunut isumaqatigiissutillu naapertorlugit atorfinitsinneqartunut naatsorsuussaavoq, annertussuserititamilu IMAK-imut tunngasuni 2005-imit 2006-imut akissarsiarititanut iluarsisutaagallartut 2%-iupput.

8. Meeqqanut inuusuttunullu ulloq unnuarlu paaqqinniffiit

8.1 Meeqqanut inuusuttunullu ulloq unnuarlu paaqqinniffiit – 2004-mi atuineruneq

Namminersornerullutik Oqartussat kommunillu akornanni 2005-imut ataatsimoortumik tapiissutitut isumaqatigiissummi illuatungeriit isumaqatigiissutigaa:

”... nuna tamakkerlugu meeqqanut inuusuttunullu ulloq unnuarlu paaqqinniffinnut missingersuutitut sanilliullugu 2004-mi atuinerusoqarsinnaavoq. Illuatungeriit isumaqatigiipput atuineruneq tamanna ukiumut missingersuusiorfiusumut 2006-imut ataatsimoortumik tapiissutini iluarsivigineqassasooq.”

Meeqqanut inuusuttunullu paaqqinniffinnut tunngasuni atuineruneq 2004-mi Nunatta Karsiata 2004-mut naatsorsuutaani katillugit 11,6 mio. kr.-inut naatsorsorneqarpoq.

Illuatungeriit isumaqatigiipput kommunit atuineruneq Kanukoka aqqutigalugu ilimasaarutigineqartoq kisiat matussusissagaat.

Taamaattumik illuatungeriit isumaqatigiipput ataatsimoortumik tapiissutit 2006-imi 8.500.000 kr.-inik ikilineqassasut, atuinerunissamut Kanukokamut siumut ilimasaarutigineqartumut naapertuuttut.

8.2 Meeqqanut inuusuttunullu ulloq unnuarlu paaqqinniffiit – 2006-imut missingersuutit

Ilaqutariinnermut Pisortaqarfiup Kanukokallu akornanni oqaloqatigiinnerit kingorna meeqqanut inuusuttunullu paaqqinniffinnut ukiumut missingersuusiordiusumut 2006-imut missingersuutit isumaqatigiissutigineqarput.

Taamaalillutik kommunit meeqqanut inuusuttunullu ulloq unnuarlu paaqqinniffinnut ataatsimut aningaasartuutaat 2006-imi katillugit 113.400.000 kr.-inut missingersuusiordneqarsinnaapput, taakkunani 50%-it 56.700.000 kr.-inut naapertuuttut kommuninut ataatsimoortumik tapiissutit ikilineqarnerisigut aningaasalersorneqassallutik.

Tamanna tunngavigalugu illuatungeriit isumaqatigiipput ataatsimoortumik tapiissutit 2006-imi 56.700.00 kr.-inik ikilineqassasut.

9. Ilaqutariit akissarsiutigalugu paarsisartunut aaqqissuussinerup malitseqartinneqarnera

Meeqqanut inuusuttunullu ikiorsiisarneq pillugu Inatsisartut peqqussutaat 1. juli 2003-mi atuutitertussatut Inatsisartut 15. april 2003-mi akuersissutigaaat. Tassunga atatillugu illuatungeriit isumaqatigiipput kommuni ukiumoortumik ataatsimoortumik tapiissutinit 2003-mut 7.927.000 kr. aammalu 2004-mit 15.854.000 kr.-inik taarsiivigineqassasut, taakkunanit 3.936.870 kr.-it kommunit ilaqutariinnut akissarsiutigalugu paarsisartunut 30-nut aningaasartuutaat ilaatinneqarlutik.

Illuatungeriit siusinnerusukkat isumaqatigiissutigaaat 2006-imut kommuninut ataatsimoortumik tapiissutinik isumaqatigiinniarnermut atatillugu meeqqanut inuusuttunullu ikiorsiisarneq pillugu peqqussutip nutaap kingunerisaanik kommunit aningaasartuutaat naatsorsorneqassasut.

Naatsorsuinermi paasineqarpoq ilaqutariit akissarsiutigalugu paarsisartunut aaqqissuussineq illuatungeriit kissaataat malillugit atorineqanngitsoq.

Tamanna tunngavigalugu illuatungeriit isumaqatigiipput 2005-imut ataatsimoortumik tapiissutit 3.806.000 kr.-inik ikilineqassasut, ilaqutariinnut akissarsiutigalugu paarsisartunut 28-nut aningaasartuutitut naapertuuttut, aammalu ataatsimoortumik tapiissutit 2006-imit 3.281.000 kr.-inik ikilineqassasut, ilaqutariinnut akissarsiutigalugu paarsisartunut 25-inut aningaasartuutitut naapertuuttut.

Taamaalilluni aallaaviatigut naatsorsuutigineqarpoq kommunit 2006-imit ilaqutariinnut akissarsiutigalugu paarsisartunut tallimanut ukiumut aningaasartuutaannut taarsiissuteqartoqartassasoq, ilaqutariinnut akissarsiutigalugu paarsisartunut 30-nut pinnani, tamanna peqqussummi oqaaseqaatini naatsorsuutigineqaraluartoq.

Illuatungeriit isumaqatigiipput ilaqutariinnut akissarsiutigalugu paarsisartunut aaqqissuussineq ataatsimoortumik tapiissummi matumani isumaqatigiissutaasumit naatsorsuutigisamit atorineqarne-

ruppat ilaqutariinnik akissarsiutigalugu paarsisartunik atuinerunermut kommunit taarsiivigineqassasut.

10. Sanaartorfissagissaaneq Nukissiorfillu erngup aqquaanut pingaarnernut aningaasartuutaat

Illuatungeriit isumaqatigiipput sanaartorfissagissaanermut apeqqutinut tunngasutigut siunissami siumoortumik isigisalerniarlutik.

Naalackersuisut 2006-imut aningaasanut inatsisisaannut siunnersuummi Inatsisartunut qinnuteqarniarput Nukissiorfiup suliaasaqarfiani sanaartorfissagissaanissamut 10 mio. kr.-init amerlanerusunik aningaasaliissuteqarnissamut akuersaaqqullugit.

Taamaaqataani kommunit sanaartorfissagissaatissanik piunasaqaateqarnissamut maleruagassatigut Naalackersuisut erseqqinnerusunik tunngavissiorniarpaat.

11. Meeqqat atuarfiisa illutaannut sillimmasiisussaatitaaneq

Meeqqat atuarfiata 1. januar 1981-imi kommuninut tunniunneqarneranut aammalu illutat amerlanerpaartaasa kommuninut ataasiakkaanit aamma tiguneqarnerannut atatillugu Namminersornerullutik Oqartussat meeqqat atuarfianni illutanut sillimmasiisussaatitaaneq ingerlatiinnarpaat.

Illuatungeriit isumaqatigiissutigaa meeqqat atuarfianni illutanut sillimmasiisussaatitaaneq kommuninut tunniunneqassasoq, tamatuma peqatigisaanik kommuninut ataatsimoortumik tapiissutit 2006-imiit 1.060.000 kr.-inik amerlineqarlutik.

Illuatungeriittaaq isumaqatigiissutigaa Ineqarnermut Attaveqaqatigiinnermullu Pisortaqaarfik kiisalu Kanukoka ataatsimoorlutik tunniussinissaq piareersassagaat, taamaalilluni 1. januar 2006-imi tunniussisoqarsinnaaqqullugu.

12. Sulineramik misiliinermut atatillugu sulineramik misiliisunut sillimmasiisussaatitaaneq

Meeqqat atuarfiat kommuninut tunniunneqarmat sulineramik misiliisut misiliinerminni ajoqusersinnaanerannut sulinerami ajoqusersinnaanermut inatsimmi malittarisassat malillugit matussuserneqartarnissaat Namminersorullutik Oqartussanit tigummiinnarneqarpoq.

Ilinniartitsisunik atorfinitsitsisarneq kommunit akisussaaffigilermassuk illuatungeriit isumaqatigiipput akisussaaffeqarfik tamanna aamma kommuninut tunniunneqassasoq, kommunit taamaalillutik atuartut ukiuminnut piginnaasaminnullu naleqqiullugu ajutooratarfiusinnaasunik suliaqannginnissaat toqqaannartumik qulakkeerinissamut suliaasaq toqqaannartumik tigummassuk.

Kommunit taamaalillutik atuartut sulinerminni pisariaqartumik ilitserorneqarnissaannik nakkutigineqarnissaannillu qulakkeerinissaminnut aamma pisussaatitaapput.

Illuatungeriit isumaqatigiipput sulinermik misiliisut sulinerannut atatillugu sillimmasiisussaataitaneq kommuninut tunniunneqassasoq, tamatuma peqatigisaanik kommuninut ataatsimoortumik tapiissutit 2006-imit 100.000 kr.-inik amerlineqarlutik.

Illuatungeriittaaq isumaqatigiissutigaaq Ineqarnermut Attaveqaqatigiinnermullu Pisortaqaarfik Kanukokalu ataatsimut tunniussinissaq piareersassagaat, taamaalilluni 1. januar 2006-imi tunniussisoqarsinnaaqullugu.

13. Isumaginninnermi peqqissaanermilu ikiortit ilinniarnerminni akissarsiaat kiisalu peqqissaanermik perorsaanermillu ilinniartitaanerni sulinermik misiliinnermi akissarsiaritit

Isumaginninnermi peqqissaanermilu ikiortit ilinniartitaanerit 2004-mi 2005-imilu iluarsartuuteqqinneqarput, maannalu ilinniartitaanerullutik immikkut ingerlasut. Ilinniartitaanernut taakkununga atuuppoq, iluarsartuusseqqinneq sioqqullugu ilinniartut ukiumi ilinniarfiusumi siullermi ukiumilu tullermi ilinniarnerminni ilinniagaqarnersiuteqartarlutik, piffissanilu sulinermik misiliinnerminni sulisitsisumit akissarsisinneqartarluk – taakkunanit kommuninit ilaat akilerneqartarlutik.

Illuatungeriit isumaqatigiipput kommunit akissarsianut aningaasartuutaat siusinnerusukkut ukiumut 4.807.000 kr.-iusut aammalu Namminersornerullutik Oqartussat ilinniagaqarnersiutinut ukiumoortumik 3.213.000 kr.-inik immikkut aningaasartuuteqartartut. Illuatungeriit isumaqatigiissutigaaqattaq kommunit ilinniartut ilinniarnermik nalaat tamaat ilinniagaqarnersiuteqalernerannut akileraarutinit isertitassaraluanit 100.000 kr.-it missaat annaagaat.

Taamaalillutik kommunit ilanngaattissat ilanngaatigereerlugit iluanaaruteqassapput 1.494.000 kr.-it missaannik (4.807.000 – 100.000 – 3.213.000) kr.

Illuatungeriit isumaqatigiipput ataatsimoortumik tapiissutit isumaginninnermi peqqissaanermilu ikiortit ilinniartut ilinniagaqarnersiuteqalernissaasa kingunerisaanik 2006-imit 3.213.000 kr.-inik ikilineqassasut.

Peqqissaasunngorniartut, peqqissaanermi ikiortinngorniartut sulinermik misiliinerannut ilitsersorneqarneranni akissarsiaqartinneqarnerat pillugu Isumaqatigiissut 2. marts 2004-meersoq malillugu sulinermik misiliisunut ilitsersuisunut 1. april 2003-mi akissarsiaqartitsisoqalerpoq.

Kalaallit Nunaanni ulluunerani aammalu ulloq unnuarlu paaqqinniffinni perorsaasutut suliaqartunut Kalaallit Nunaanni Naalackersuisut aammalu PIP-ip akornanni isumaqatigiissut 23. august 2002-meersoq malillugu sulinermik misiliisunut ilitsersuisunut/ilinniartitsisunut 1. april 2001-imit akissarsiaqartitsisoqalerpoq.

Illuatungeriit isumaqatigiissutigaat kommunit ilanngaatisat ilanngaatigereerlugit katillugit 1.494.000 kr.-inik iluanaarutit ilaat atussagaat sulinermik misiliisunut ilitsersuisut/ilinniartitsisut akissarsiaasa aningaasalersorneqarnissaannut.

Tamatuma peqatigisaanik illuatungeriit isumaqatigiipput sulinermik misiliisunut ilitsersuisut/ilinniartitsisut pillugit siunissami apeqqutit suliat attuumassuteqartut pillugit isumaqatigiinniarnernut atatillugu oqaluuserineqassasut.

14. Eqqakkat aqquataannut pingaarneernut aningaasaleeqqinneq pillugu isumaqatigiissutip malitseqartinneqarnera

Illuatungeriit 2005-imut ataatsimoortumik tapiissutit pillugit isumaqatigiissummi isumaqatigiipput 2005-2009-mi eqqakkat aqquataasa iluarsarneqarnissaannut katillugit 85,0 mio. kr.-it immikkoortineqassasut, ukiumut 17 mio. kr.-inut agguarneqartunik.

Isumaqatigiissutip malitseqartinneqarneranut ilanngunneqarpoq ilanngussaq 3, tassani piffissamut 2005-2009-mut iluarsaanissamut pilersaarut tamakkiisumik aalajangersagaasoq kommuninullu ukiumoortumik 17 mio. kr.-inut agguagaasoq takutinneqarpoq.

Kommunit ataasiakkaat iluarsaanissamut pilersaarutip malinnissaanut imminnut pisussaatipput.

2006-imut aningaasanut inatsimmi iluarsaanissamut pilersaarut aalajangersarneqartoq kommuninullu agguarneqartoq aallaavigalugu Naalakkersuisut 2006-imi ukiunilu tamani 2007-2009-mi eqqakkat aqquataannik iluarsaanissamut, pilersaarusiorneq misissueqqaarnerillu ilanngullugit, 17 mio. kr.-it atorqeartussat taaneqartut kommuninut neriorsuutigineqarnissaat Inatsisartunit akuersissutigeqqullugit qinnuteqarniarput, taamaalilluni kommunit ukiunut arlalinnut pilersaarusiornissamut iluarsaanissamullu aningaasatigut qulakkeerneaqqullugit.

15. Assigiimmik akeqartitsinerup atorunnaarsinneqarnerata kingunerisaanik iluarsisuteqarneq

”Ukiumut missingersuusiorfiusumut 2005-imut Ilassutitut isumaqatigiissummi” 28. oktober 2004-meersumi illuatungeriit isumaqatigiipput ukiuni 2005-2009-mi atuinikinnerunissamut takussutisiami naatsorsorneqartut naapertorlugit ataatsimoortumik tapiissutit iluarsivigineqassasut. Takussutissiaq taanna ilassutitut isumaqatigiissummi ilanngussaq 3-mi takuneqarsinnaavoq.

Ilassutitut isumaqatigiissummi ilanngussaq 3 naapertorlugi kommunit aningaasartuutikinnerussutaat 2005-imi 5.260.353 kr.-init 2006-imi 3.464.356 kr.-inut nikipput. Assigiinngissut kommunit 2005-imit 2006-imut aningaasartuutaasa qaffassutissaattut naatsorsuutininut naapertuupput. Assigiinngissutsit 1.796.000 kr.

Tamanna tunngavigalugu illuatungeriit isumaqatigiipput ataatsimoortumik tapiissutit 2006-imi 1.796.000 kr.-inik amerlineqassasut.

16. TELE-p ilinniartitaanermut internetikkut quppersagaani ATTAT-mi akitsuutinik qaffaana

TELE ilinniartitaanermut internetikkut quppersakkamik atuisunut akitsuummik qaffaanissani ilimasaarutigaa, taakkunanit atuisut akitsuutaannut meeqqat atuarfiisa akiligassaat 2005-imut Aningaasanut inatsimmi 1.102.800 kr.-iullutik. TELE meeqqat atuarfiata atuineranut akitsuutip 2006-imit 2.224.000 kr.-it missaannut qaffannissaa ilimasaarutigaa.

Tamanna tunngavigalugu illuatungeriit isumaatigiipput ataatsimoortumik tapiissutit 2006-imit 2.224.000 kr.-inik ilaneqassasut, meeqqat atuarfiisa TELE-p ilinniartitaanermut internetikkut quppersagaanik ATTAT-mik atuineranut akitsuutip qaffannissaanut ilimasaarutaanut atuinerunermut taarsiissutissat.

17. Sulinermik nakkutilliisoqarfiup malittarisassiai sukannererusut

Danskít folketingiata 2005-ip ingerlanerani sulinermi avatangiisinut tunngasunut inatsit akueraa, Kalaallit Nunaannut 1. januar 2007-mit inatsisitut atuuttussanngortussaq.

Kanukoka tassunga atatillugu ilisimatitsivoq Sisimiut kommunianni sulinermi avatangiisinut tunngasuni suliniutinik ingerlatsisoqartoq.

Illuatungeriit isumaqatigiissutigaat oqaluserisassaq ukiup tulliani ataatsimoortumik tapiissutit pillugit isumaqatigiinniarnissamut sammeqqinneqassasoq, tassungalu atatillugu Sisimiut kommunianni misilittakkatigut tunngavigineqartut atorniarneqassasut.

18. Uersagaqarnersiutin A-nit akiligassaqarfiit

Ukiuumut missingersuusiorfiusumut 2002-mut ataatsimoortumik tapiissutit pillugit isumaqatigiisummi uersagaqarnersiutin A-nit akiligassat kommunini ajornartorsiutigineqaleraluttuinnarnerat illuatungeriinnit isumaqataaffigineqarpoq.

Illuatungeriit isumaqatigiipput ajornartorsiut siammassinnerusumik isiniarneqassasoq, tassungalu atatillugu isumaqatigiillutik suleqatigiissitaliortoqassasoq, pisortanut akiligassat isumakkeerneqarnissaannut assigiiarnerusunik malittarisassiornissamut siunnersuusiorsinnaasumik, tassunga ilanngullugit uersagaqarnersiutinut tunngasuni akiligassaqarfinnut.

19. Atuarfinnik iluarsaaneq sanaartorlu

Illuatungeriit isumaqatigiipput pingaartuusooq atuarfiit allanngortiterneqassasut allilerneqassasullu Atuarficialiammi atuartiseriaatsinik tunngavigineqartunik ingerlatsinissamut atuartullu maanna amerlassusiannut inissaqartitsinissamut periarfissillugit.

NAMMINERSORNERULLUTIK OQARTUSSAT
KALAALLIT NUNAANNI KOMMUNEQARFIIT KATTUFFIAT

Illuatungeriittaaq isumaqatigiissutigaat atuarfiit illutaasa aserfallatsaaliineqarnissaat salliutinneqasasooq aserfallatsinnginnissaat pillugu. Taamaattumik illuatungeriit kaammattuutigaat kommunit ukiumoortumik illutat kvadratmeterimut ataatsimut nalingisa 1,5 – 2%-iannut immikkoortitsisassasut ingerlaavartumik aserfallatsaaliinermut atugassanik.

20. Pissutsit allat

Namminersornerullutik Oqartussat kommunillu akornanni ataatsimoortumik tapiissutit pillugit isumaqatigiissut una oqartussaasut akuersisussaataasut akuersinnissaat naatsorsuutigalugu atsiorneqarpoq.

Ilulissat, ulloq 7. juni 2005.

Josef Motzfeldt
Aningaasaqarnermut Nunanullu allanut
Naalakkersuisoq

Jens Lars Fleischer
Kalaallit Nunaanni Kommuneqarfiit
Kattuffianni Siulittaasoq

NAMMINERSORNERULLUTIK OQARTUSSAT
KALAALLIT NUNAANNI KOMMUNEQARFIIT KATTUFFIAT

Ilanngussaq 1. Aningaasanut pilersaarusiorfimmumut 2006-imut kommuninut ataatsimoortumik tapiissutissat pillugit isumaqatigiissutip immikkuualuttortai

	Isumaqatigiissut			
	2006	2007	2008	2009
2005-imut isumaqatigiissummi aallaaviusooq	796.370.000	796,4	796,4	796,4
1. Akinut akissarsianullu iluarsiiisutit	12.344.000	12,4	12,4	12,4
2. Nalinginnaasumik sipaarutit	-12.950.000	-38,8	-64,7	-77,7
3. Akileraartarnermut tunngasut nunap immikkoortuinut eqitern-eqarnerat	0	0,0	0,0	0,0
4.1 2003-2004-mi siusinaartumik pensionisialinnut aningaasartuutit iluarsiivigineqarnerat	1.598.000	0,0	0,0	0,0
4.2 Siusinaartumik pensionisiat iluarsiivigineqarnerat, 50/50-imik aaq-qissuussinermi pensionisiallit amerliartornerat, 2006	5.900.000	9,2	12,3	15,2
4.3 Ineqarnermut tapiissutit 2004-mut iluarsiivigineqarnerat	-6.190.000	0,0	0,0	0,0
4.4 Ineqarnermut tapiissutit 2006-imit iluarsiivigineqarnerat	-6.000.000	-6,0	-6,0	-6,0
5. Meeqqat atuarfianni akuleriissitsineq	838.000	0,8	0,8	0,8
6. Atuarfitsialak	-200.000	0,3	-6,3	-6,3
7. Immikkut annertusisamik atuartitsineq	0	0,0	0,0	0,0
8.1 Meeqqanut inuusuttunullu ulloq unnuarlu paaqqinniffiit – 2004-mi atuineruneq	-8.500.000	0,0	0,0	0,0
8.2 Meeqqanut inuusuttunullu ulloq unnuarlu paaqqinniffiit – 2006-imut missingersuutit	-2.659.000	-2,7	-2,7	-2,7
9. Ilaqutariit akissarsiutigalugu paarsisartunut aaqqissuussinerup malitseqartinneqarnera	-7.087.000	-3,3	-3,3	-3,3
10. Sanaartorfissagissaaneq Nukissiorfiillu erngup aqquataannut pingaarnermut aningaasartuutaat	0	0,0	0,0	0,0
11. Meeqqat atuarfiisa illutaannut sillimmasiisussaataaneq	1.060.000	1,1	1,1	1,1
12. Sulinermik misiliinermut atatillugu sulinermik misiliisunut sillimmasiisussaataaneq	100.000	0,1	0,1	0,1
13. Isumaginninnermi peqqissaanermilu ikiortit ilinniarnermi akissarsiaat kiisalu peqqissaanermik perorsaanermillu ilinniartitaanerpi sulinermik misiliinermi akissarsiaritit	-3.213.000	-3,2	-3,2	-3,2
14. Eqqakkat aqquataannut pingaarneernut aningaasaleeqqinneq pillugu isumaqatigiissutip malitseqartinneqarnera	0	0,0	0,0	0,0
15. Assigiimmik akeqartitsinerup atorunnaarsinneqarnerata kingunerisaanik iluarsiiisuteqarneq	1.796.000	3,4	4,5	5,7
16. TELE-p ilinniartitaanermit internetikkut quppersagaani ATTAT-mi akitsuutinik qaffaanera	2.224.000	2,2	2,2	2,2
Kommuninut ataatsimoortumik tapiissut nutaaq	775.431.000	771,9	743,7	734,7